



1. marts 2012

Matumuuna Inatsisartut suleriaasianni § 37 naapertorlugu Naalakkersuisunut apequteqaat ingerlatippara.

(Inatsisartunut ilaasorta q Aqqaluaq B. Egede, Inuit Ataqatigiit)

Apeqqutit:

1. Nunatsinni suliffeqarfiit sanaartortut nunaqavissutut taaneqarsinnaasut, suliffeqarfinnut neqeroortitsisoqartillugu suliassanut anginerusunut tigusinissaannut periarfissaqalersinniarlugit Naalakkersuisut suliffeqarfiit nunaqavissut piginnaasatigut siuarsarniarlutik qanoq iliuseqarpat?
2. Inatsisartut Aningaasanut Inatsisaat aqqutigalugu sanaartornermut aningaasaliissutaasartut amerlapput. Aningaasaliissutit nunatsinni annertunerpaamik iluaqutigineqalernissaat anguniarlugu qanoq Naalakkersuisunit pilersaaruteqartoqarpa?
3. Suliariumannittussarsiuussisarnermi entrepriset immikkoortut pingasut piunasaqaataasa avataatigut sanaartugassanut annertuunut suliffeqarfiit nunaqavissut suliffeqarfinnut nunatta avataaneersunut unammillersinnaanerulernissaat qanoq Naalakkersuisunit takorloorneqarpa?
4. Sanaartorfinni sulisuusut nunatsinni innuttaassuseqartut sulinerminni nalunaaquttap akunnerini aalajangersimasuni sapaatsit akunneranut sulisussaataa nerat qaffaavigineqarsinnaanera Naalakkersuisunit periarfissatsialattut isigineqarpa?
5. Inatsisartut Aningaasanut Inatsisaat aallaavigalugu sanaartugassatut neqeroorutaasartut pillugit, neqeroortitsinermit ilinniartoqarnissamik piunasaqaateqarsinnaanerup sakkortusarnissaa siunertaralugu Naalakkersuisut pilersaaruteqarpat? Taamaassimappat qanoq?
6. Nuuk-mi inissianik sanaartortoqarnissaannik pisariaqartitsisoqarneranut naapertuuttumik aningaasaliissuteqartarneq pivoq. Tamatuma malitsigisaanik illoqarfinni nunaqarfinnilu sanaartornissamik pisariaqartitsineq annertusiartupiloortoq Naalakkersuisut Naalakkersuisut qanoq iliuseqarfiginialersaarpat?
7. Sanaartornermut aningaasaliissutit nunatsinni sanaartugassanik pisariaqartitsinermit naapertuuttumik, tassa siammasinnersumik

sanaartugassanut aningaasaliissuteqarnissaq ukiup tulliani
naatsorsuutigineqarsinnaava?

Tunngavilersuut

Ukiut tamaasa nunatsinni sanaartugassanut assigiinngitsunut nunatta karsianit aningaasaliissutaasartut amerlapput. Nunatsinni aningaasarsiornikkut pisinnaassuseqarnitta qaffassarnissaa anguneqassappat, nunatsinni, inuillu namminerisaminnik aningaasarsiornerat qaffassarneqartariaqarpoq.

Nunatta avataanit suliffeqarfinnik isumalluuteqarneq annertuallaamik nunatta avataanut aningaasanik annissuineramik kinguneqarpoq. Nunatta aningaasarsiornera, nunattalu inuisa aningaasarsiornerat qaffassarsumallugu nunatta avataanit isumalluuteqarneq millisassallugu politikkikkut suliassaavoq annertoq, malunnaateqarnerusumik sammineqartariaqartoq.

Inatsisartut suleriaasiat naapertorlugu Naalakkersuisunut apeqqutit naatsumik tunngavilersorlugit ilinniartoqarneq, suliffeqarfiillu nunaqavissutut naqissuserneqarsimasut pillugit apeqquteqaatiga ingerlatippara.